

[Augsburg], 25. August 1561

An Johannes Oporinus

UB Basel, Fr. Gr. I 11, fol. 246r-v.

Steinmann Nr. 736.

Lit.: Husner S. 160; Steinmann S. 99 (mit Auszug).

S. P. D. Hodie sum cum D. Ioanne Fuggero pransus. Quantum intellexi, reuersus è Nondinis Gregoram apud Carinum inuenies. Quantum pecuniae et quib[us] conditionibus ad te mittatur: quaerere me non decuit, cum de industria id caelarer. Illud tantum dixi te fidem vtique seruaturum, nisi calamitate aliqua impedireris. Hac ipsa hora missus est ad me Georgius Cedrenus non tam opinor tituli declarandi causa, quam vt multò ante admouerer, τὰ παραλειμένα, Zonarae iterum edendo, adjicienda esse. In quo nec officio meo, si per fata licuerit, nec tuo desiderio deero.

Isocratem Sophiani cum accepero, conferam, et quicquid operaeprecium videbitur vel corrigam vel addam.

Demosthenis etiam graecolatini editionem exornarem nouis castigationibus et annotationibus, augeremque reliquis oratorum orationibus (. Restant autem adhuc Lysias satis prolixus, et reliqui breuiores.) si tam diuturnam mihi valetudinem et vitam polliceri auderem. Cupio enim votis studiosorum satisfacere, etsi fortasse breui futurum est, vt nomen meum in omnibus meis lucubrationibus expungatur. Sic enim nuper decreuit Pontificius inquisitor. Itali parebunt libenter non tam ex religione quam inuidia. De Gallis dubito. In Hispaniam nihil vnquam meum peruenisse existimo. Sic tractatus est etiam Trapezuntius. Sed quid id mea? τῶν γὰρ θανόντων ἄλγος οὐδὲν ἀπτεται, modò viuenti non desit vnde viuam.

Riuio cur non adiungis etiam profana? vt duo fiant tomi. Editionem meam Logici operis ad te mitto. Arrianum tuae fidei committo quem ab Erhardo Hillero accipies vnà cum literis quibus 2 ducati sunt inclusi pro Epicteti 25 exemplis.

Lycosthenis nostri funus celebrare profectò non vacat. Diu in thermis abfui, parum valeo, multis rebus impedior. D. Tschardio multam opto salutem, et tibi propicium τὸν λόγιον καὶ ἐπιούνιον ἔρμην. Vale. Raptim 25 Augusti 1561.

T[uus] H[ieronymus] Wolfius.